



www.BibleForChildren.org



Jon 14



A Jisas ke velera nigna na komi vaovarongo, "Oti saghoi lubatia na ghaghanamiu keda dika eigna na komi fata ku veleghamu irangeni. Kari oti voututunia a God moti voututuniu inau ghua. Kori vathegna a Tamagu sethe na chogho koragna, mi nau kuda vano bali kalitira na komi chogho vanighamu."



"Gi keda boi tutuni, inau teo kuda veleghamu iangeni.
Kori vido na komi chogho ke kaikaliti ghohi, inau kuda
ghoi tabiru mai mu talangighamu eigna kotida mono
duagu hahali ngengeni."




Inau a Jon a kulamiu kori Krai. Ighita kati
papara eigna a Jisas Krai ke vunaghi
pungusia na havida, keana imanea

ke vahetaghita eigna
katida sokara ngasi.




Imarea kena bou kori moumolu iso i Patmos
eigna kena bosu magnahaghiniu kuda talu
titiono a mua na haghoregna a God


ma na rorongo eigna
a Jisas Krais.




Kori vido vamua iangeni na Tarunga ke Tabu ke batua
na ghaghanagu mu reghia na sapei vunaghi i popo ke
nohe sina tinoni itagna.




Gi inau ku rongovia na komi fata gougovu ke havi i
popo mi thepa mi kori tahi, ma na komi tarunga
kori melehadia arahai kena thehe,
imarea kena sale vaghagna iaani,
"Ati veletoke hahalia ahai ke
nohe kori sapei vunaghi ma na
Dathei Sip. Ati kilothabara
mati ghaghana
bohera eigna
koro mana
puala."




Mu reghia na meleha ke tabu, na Jerusalem
mathangani ke horu mai i popo tagna ke mono a God.
Na meleha iangeni ke ulaghagna vaghagna na vaivine
ke pipisia na pohe ke ulaghagna kori dani keda
taulaghi tagna a taugna. Inau ku rongovia na ohai
haghore ke
haghore heta
au mai tagna na
sapei vunaghi
vaghagna iaani,
"Ikeagaieni na
melehagna a God
ke mono tadia na
komi tinoni."




"A God keda mono duadia mi imarea keda nigna na komi tinoni. Tutuni, a God ghehegna keda mono duadia mi manea keda nidia a God."



Gi na enjel ke tuhua vaniu sina bea ke raraha
vaghagna na gilasi ke sasalala au mai tagna na sapei
vunaghi nigna God ma na Dathei Sip. Na bea i havi
hau ke mono koragna na bea iangeni.



Na meleha iangeni, e toke vamua na vula ma na aho
keda boi raraha itagna. Eigna na siasiladagna a God
ke laema itagna ma na Dathei Sip na luigna.



Kari teo sa fata ke
dika me teo ahai ke eia
na komi puhi ke dika
ba piapilau keda haghe
mai kori meleha
iangeni. Arahai
vamua ke mono
na ahadia kori
buka i havi nigna
na Dathei Sip
kedana mono
itagna.



"Imanea keda havula aua na
bea ke lulu tagna na matadia.
Imarea teo kedana ghoi thehe
ba dikahehe ba tangi ba
papara eigna na komi fata ke
dika ke mono kori maramagna
haulaghi ke teo ghohi."




Na papara ma na thehe ke padara na komi tinoni
gougovu i hau eigna na koakoa, teo keda padara na
komi tinoni kori na meleha mathangani iangeni. A God
ma na Dathei Sip koroda nohe kori rodia na sapei
vunaghi ma na komi
tinoni agutu nigna
a God kedana
maimanihihia.
Imarea kedana
reghia na
matagna God
ma na ahagna
keda mono
kori langedia.




Gi inau ku reghia na komi tinoni gougovu kena thehe ghohi, na komi naghoi tinoni ma na komi hai tinoni, imarea kena sokara naghogna na sapei vunaghi. Ma God ke vurehea na komi buka ke mono na titionodia na komi tinoni kori vido kena havi mua.

Me vurehea mua na buka i havi. Imanea ke fatera na komi tinoni leghuagna na komi tango kena eia ke mono tagna na komi buka.




Gi a God ke sonira vano arahai kena boi mono na
ahadia kori na buka i havi hau kori vido ke ghatha na
joto thovohaliu. Na joto iangeni, na varuai thehe
keda boi govu. Ma God ke sonira vano mua na thehe
ma na melehadia arahai kena thehe
kori joto iangeni.



Na Tarunga ke Tabu ma na vaivine keda taulaghi
tagna na Dathei Sip koro veleagna a Jisas, "O mai!"
Ighamu koti rongovia na komi haghore kori buka iaani
kotida velea mua, "O mai!" Mi ghamu koti langasa, oti
mai! Gi kotida magnahaghinia na bea i havi, oti mai

hatia vamua,
eigna na
bea

iangeni boi
bali voli.



Na vunegna a God ke dothovira puala
na komi tinoni kori maramagna, imanea
ke lubatia maia sikei vamua ghathi
Dathegna eigna arahai kena
vaututunia kedana boi thehe,
kari imarea kedana hatia
na havi ke teo na
govugna.



Rom 3:23 Na komi tinoni gougovu kena koakoa ma na puhidia ke haunia na puhigna a God ke haluhadi puala.

Rom 6:23 Na voligna na koakoa, na thehe ke teo na govugna. Keana na dotho a God ke eia vanighita, na havi ke teo na govugna. Tagna na havi iangeni, ighita katida sikei duagna a Jisas Krais, na nida a Lod.

Hibru 9:27 Na komi tinoni e sikei vamua na theheadia. Govu gi a God ke fatera.

Efesus 2:8,9 Na vunegna a God ke pukuni dothovighamu, imanea ke vahavighamu kori vido koti voututunia a Krais.

A God ke vahavighamu boi eigna sa fata koti eia. Teo.

Na vahavighamugna ke eia iangeni, imanea ke hai heghamu vamua. Na vunegna a God ke boi vahavighamu eigna sa fata ke toke koti eia, teo ahai ke tangomana na titiono tautalunagho.



Rom 10:9,10 Gi ahai itamiu koda vele aua kori livomu a Jisas a Lod, mo voututuni kori hehemu a God ke vasokaraghini tabirua a Jisas kori thehe, a God keda vahavigho. Kori vido ko voututuni, a God keda velea ighoe ko jino kori matagna, mi kori vido ko titiono aua Jisas a Lod, a God keda vahavigho.

Jon 3:16,17 Na vunegna a God ke dothovira puala na komi tinoni kori maramagna, imanea ke lubatia maia sikei vamua ghathi Dathegna eigna arahai kena voututunia kedana boi thehe, kari imarea kedana hatia na havi ke teo na govugna. A God ke bosi vetula maia a Dathegna kori maramagna eigna keda fatera na komi tinoni kori maramagna, kari imanea ke vetula maia eigna keda vahavira.



1 Jon 5:11-13 Ighita kati adoa na hava a God ke velegghita ke tutuni eigna ke heghita ghohi na havi ke teo na govugna. Ma Jisas, a Dathegna, na hangana bali hatiagna na havi ke teo na govugna.

Ma ahai ke mono haidu toetoke duagna a Dathegna a God, imanea ke hatia na havi iangeni. Keana ahai ke boi mono haidu toetoke duagna a Dathegna a God, imanea ke boi hatia na havi ke teo na govugna.

Itamiu ghamu koti voututunia a Dathegna a God, inau ku risoa na komi fata kori letasi iaani eigna kotida adoa ighamu koti hatia ghohi na havi ke teo na govugna.



Jon 14; 2 Korin 5; Tate Au 4, 21, 22

Storyline by: Edward D. Hughes

Illustrated by: Lazarus
and Alastair Paterson

Adapted by: Sarah S.

Bughotu Bible (bgt) © 2009, Wycliffe Bible Translators,
Inc. All rights reserved.

<https://live.bible.is/bible/BGTNEW/MAT/1>

©2026 Bible for Children, Inc.

www.M1914.org

www.bibleforchildren.org

